



DABA-DABA

Rebolusyonaryong Pahayagan Pangmasa sa Panay

Tuig 15 Numero 3

Setyembre 2002

Editorial

Paslawon ang “all-out war” sang rehimeng US-GMA!

Tuman kalubha sang krisis sa katilingban. Ang taga ka adlaw nga nagalabay nagapakita sang dugang nga paglala sang sosyo-ekonomiko, pinansyal kag pulitikal nga krisis. Apang tigaylo nga lubaron ang krisis, “all-out war” ang solusyon sang rehimeng Gloria Macapagal-Arroyo (GMA).

Labi subong nga nagdaku ang kautangan sang gubyrno sa sulod kag sa gwa sang pungsod. Nagaabot sa 60% sang badyet sang gubyrno ang awtomatiko ginabayad sa masobra \$54 bilyon nga kautangan sang pungsod sa luwas. Sa tuig 2003, magabayad ang Pilipinas sang P47 milyon kada oras sa interes lang sang utang sa luwas, ukon masobra isa ka bilyon ka pesos kada adlaw.

Indi makontrolar ni GMA ang nagadaku nga depisit sa badyet sang iya gubyrno. Nagaabot na ini sa P155 bilyon para sa tuig 2002 bisan anhon sang pigar nga indi maglapaw sa P130 bilyon. Nagagasto ang gubyrno sang kwarta nga wala pa niya natipon

Indi man makapagusto pangayo ayuda si GMA sa iya agalon nga imperyalismong US bisan anhon niya sa



pagpakatuta. May kaugalingon man nga krisis ang US. Nag-atras sa \$25 milyones na lang ang maayuda sang US, indi \$55 milyon nga sadto ginpangako sini para sa “kontra-terorismo” nga operasyon nila.

Nagapanubo ang koleksyon sang buhis halin sa mamumugon sa luwas nga ginasaligan sang rehimen. Ginapabalik na gani sa Pilipinas ang 400,000 ka mamumugon halin sa Italya, Israel kag Malaysia. Magadamo pa ini bangud sang nagahana nga gyera sa

Iraq kag palibot nga lugar, kun sa diin may 1.5 milyon nga Pilipino nga mamumugon sa Middle East, kag 147 sini ara sa Iraq.

Ining mga mamumugon nga nagbalalalik halin sa luwas nga wala na trabaho, dugang naman sa masobra apat ka milyon nga pwersa nga wala na nga daan sang trabaho diri sa pungsod. Idugang pa ang 64,000 nga pumuluyo nga ginpangdeport sang Malaysia halin sa Sabah pabalik sa Mindanao. Nagadamo ang mga disempleado kag lapnagon ang gutom. Nagaabot subong sa 88 porsyento sang mga pamilya nga Pilipino ang imol ukon wala nagapangabuhi sang disente.

Ang banggianay sa sulod sang nagaharing sahi nagalala man. Bangud sang maniobrahanay kag pang-ipit, sunod-sunod nga ginpahalin kag naghalin sanday Teofisto Guingona bilang sekretaryo sang Foreign Affairs, Raul Roco bilang sekretaryo sang DECS, Rene Banes bilang komisioner sang BIR kag si Anthony Abad bilang administrador sang NFA.

Nagalala ang mga anomalya kag korapsyon sa halos tanan nga ahensya sang gubyerno. Tudo larga ang mga sindikato sang kriminalidad nga ginapadalagan sang mga opisyal sang AFP kag PNP. Samtang wala untat ang pagpaigting sa pagpanalakay sa mga pumuluyo nga nagahimakas sa pagdampig sang ila kinamatarung. Ginpasulod kag padayon pa pasudlon sang rehimen ang tropang Amerikano sa Pilipinas. Dugang nga naglala kag magalala pa ang kinagamo sa pungsod.

Krisis sa Panay

Indi matabunan nga lapnagon sa isla ang gutom kag pagpanglupig dala sang pagpatuman ni GMA sang kontra-pumuluyo nga polisiya. Bagsak ang agrikultural nga produksyon sa isla halin sa palay, kalamay, pangisda, kopras. Wala untat ang pagtaas ang presyo sang balaklon

kag nagahana ang pagtaas naman sa presyo sang produktong langis. Nagadasig ang pagkalaguba sang pangabuhian sang mga imol sa kaumhan kag kasyudaran. Wala untat ang demolisyon sa mga imol sa syudad kag kawawad-on sang trabaho. Nagaos-man ang kita sang empleyado kag magagmay nga propesyunal kag negosyante.

Masingki ang pagpang-agaw duta sa kaumhan, pareho sa kadutaan sang mga Tumandok sa Sentral Panay nga ginaagaw sang militar sa ngalan sang “army reservation”. Isa ka batalyon sang kaaway ang ginkonsentrar sa kabukiran lang sang Tapaz, Capiz agud tapnaon ang paghimakas sang mga ginagutom nga Tumandok.

Ginapahug man sang militar ang mga mangunguma sang 120 ektaryas nga kadutaan sa *stockfarm* nga madugay na nila nauma kag nadebelopar sa Bungsuan, Dumarao, Capiz. Lapnagon man ang mga pagpang-abuso kag paglapak sang tawhanon nga kinamatarung sang pumuluyo sa kasyudaran kag kaumhan.

Inutil ang serbisyo sosyal sang rehimen. Maapektuhan pa gid ang pumuluyo sa isla bangud kaltasan sang rehimeneng GMA sang 27 porsyento ang badyet para sa mga ahensya sang gubyerno sini. Buhinan man sang 20 porsyento ang IRA (Internal Revenue Allotment). Halimbawa, ang probinsya sang Iloilo may bulanan nga IRA nga nagalab-ot P54.8 milyon, pero gabaton na lang ini sang P43.85 milyon kada bulan.

Nagaluntad man ang banggianay sang lokal nga nagaharing sahi. Sa Antique, naghayag ang banggianay sa tunga ni Gob. Salvacion Perez-Zaldivar batuk sa kampo nanday Bise Gob. Bob Operiano, meyor Vincent Piccio sang Belison kag 11 pa ka mga meyor sa amo nga probinsya nga nagbiya sang pagsuporta sa gobernador. Sa Iloilo, nangin palaagyan man ang eleksyon sang Sangguniang

**Nagakahulugan ang
“all-out war” sang
dugang nga
pagpasingki sang mga
kampanya sa
pagpanglupig indi
lang sa Partido, NPA
kag NDF, kundi bisan
sa mga ligal kag
progresibo nga
organisasyon sang
pumuluyo. Para sa
rehimen, terorismo na
ang pagreklamo kag
pagkontra sa malaut
sini nga paghari.**


Kabataan (SK) nga makita ang banggianay sang mga pulitiko pareho sa grupo ni Gob. Niel Tupaz batuk sa grupo ni Garin.

Gusto ni GMA nga hapaan ang tanan agud makakontrol sang kaugalingon nga tinawo. Si Franklin Fuentebella ginhimo niya nga Presidential Adviser sa Rehiyon 6 kag si Rene Villa nga amo ang sa ini nga pwesto sadto ginhimo nga manugkoordinar na lang sang Regional Disaster Committee. Ang organisasyon nga “Kaibigan ni GMA” sa Iloilo napihak man kag ang isa ka paksyon ginakontrol ni Fuentebella.

“All-out war,” solusyon ni GMA sa krisis

Nagawaras si GMA agud mapakita nga kontrolado pa niya ang sitwasyon bisan pa indi na gani siya makalubad sang binanggianay sa sulod sang kaugalingon nga hubon. Labi pa gid siya nga nagpakatuta kag sa dikta sang US, gindeklarar sini ang “all-out war” batuk sa mga pumuluyo kag pwera sang Partido, NPA kag NDF.

Nagakahulugan ang “all-out war” sang dugang nga pagpasingki sang mga kampanya sa pagpanglupig indi lang sa Partido, NPA kag NDF, kundi bisan sa mga ligal kag progresibo nga organisasyon sang pumuluyo. Para sa rehimen, terorismo na ang pagreklamo kag pagkontra sa malaut sini nga paghari. Kag matukod lang ang “mapag-on nga republika” paagi sa pagtudo-gyera



batuk sa paghimakas sang pumuluyo.

Sandig diri, gintalana sini nga badyetan ang militar sang P29 bilyones kadungan sa pagbuhin sa IRA kag badyet sa mga ahensya sang gubyerno. Nag-ambisyon ang rehimen nga dugangan sang pito ka libo ang tropa nga regular kag padamuon ang CAFGU. Amo man, ang pagpabulig sa tropang Amerikano sa pag-engkwentro sa NPA.

Indi makakilibot ang “all-out war” sang rehimen. Sadto pa ginmandu na niya sa AFP kag PNP nga pasingkion ang pagpanalakay sa mga prenteng gerilya nga naghalit sa madamo nga pumuluyo. Sa Panay, sadtong Hulyo 2001 pa nagsingki ang pagpanalakay sang 3rd ID/PA kag Task Group-Panay. Sugod sang magpungko sa poder si GMA sang Enero 2001, sa rekord sang KARAPATAN, indi magnubo sa 1,334 ka kaso sang paglapas sang tawhanon nga kinamatarung ang nakomiter sang estado. Samtang segi man si GMA sa pagpaniplang

nga kuno handa ini nga makigsugilanon sa NDF para sa kalinungan. Sang ulihi, iya ginbasura ang negosasyon pangkalinungan kag walay lipud-lipod nga nag-atake.

Pagdeklarar sang “all-out war” nagwakak-wakak man ang mga sumulunod sang rehimen pareho kay Garcia nga hepe sang PNP sa Rehiyon 6. (Ginbuslan siya sining Setyembre ni P/CSuprt. Marcelo Navarro.) Gilayon ini nanghangkat sang tiruhay sa tunga plasa sa mga NPA. Kahambog kay Garcia nga indi man gani niya mapalinong ang gamo sa waterfront sa Iloilo City, indi makalubad sang problema sa iligal nga druga kag iban nga kriminalidad. Wala siya kinalis kay GMA, Roilo Golez kag Roy Cimatu nga naghambal nga “patay na si Abu Sabaya”, “nalutos na ang Abu Sayyaf”. Apang wala man gani napapas ang mga bandido nga ara man lang sa 1,300 kilometro kwadrado nga kalaparon sang Basilan kag padayon nga nagapangidnap. Daku nila ini nga kahuy-anan sa mata sang kalibutan.

Batuan kag paslawon ang rehimen

Ang “all-out war” indi makatukod sang “mapag-on nga republika” kay wala ini nagalubad sang krisis. Ining papet nga republika padayon nga nagakadunot. Ang pagpanglupig




kag pagpalubha sang gutom nagatudlo sa malapad nga pumuluyo sa pagpangapin sa kaugalingon, pagbato kag pagpaslaw sa rehimen. Ang solo nga banas para sa pigos nga pumuluyo amo ang pagpadayon sang rebolusyonaryong paghimakas kag dugang nga isulong ang malawigan nga inaway banwa.

Maathag sa rebolusyonaryong pwersa sa Panay nga nagaatubang ini sang panibag-o nga lebel sang reaksyon sang kaaway, bag-o nga lebel sang krisis kag bag-o nga lebel sang paghulag. Kabahin sang pagpaslaw sa rehimen ang padayon nga pagkonsolida sang pwersa kag pagbatak sang kapasidad sini sa pagpakig-away.

Sa tunga sining malala nga krisis kag panibag-o nga reaksyon sang kaaway, padayunon sang

rebolusyonaryong pwersa ang labi nga pagpadasig sa pag-organisa sang linibo-libo nga pumuluyo sa kaumhan kag kasyudaran. Santo sa husto nga pamaagi, malaparan nga pahulagon sila sa paglubad sang kaimulon kag iban nga demanda. Kadungan sini, padayunon man ang pagpataas sang ila kamuklatan kag pataason ang lebel sang mga organisasyon sang pumuluyo. Ini tanan paagi sa pagpamuno sang Partido nga nagaduot sa malapad nga masa.

Ang “all-out war” nga polisiya ni GMA nagtungtong sa malubha na nga daan nga krisis kag indi madiktahan sang rehimen ang tanan nga dalagan sang sitwasyon. Paslawon ini sang pumuluyo sa pagpamuno sang Partido, katulad nga ginpaslaw man nila ang mga padihut sang nauna nga mga papet nga rehimen. 

all-out war: **terorismo sang rehimen US-GMA**

Sa tunga sang malala nga krisis sang US, gusto sang gubyernong Bush nga ipakita nga ara gihapon ang iya inisyatiba. Tuyo niya lubaron ang krisis paagi sa gyera para mag-andar ang ekonomya. Kag paagi sa gyera, padayon nga mangsakop ini sang iban nga pungsod kag pasundon sa gusto nila para makasuyop sang superganansya.

Sandig diri, naglunsar sang “gyera batuk sa terorismo” ang US kag ginrason ang Sept. 11 nga pagpang-atake sa New York agud baslan ang Afghanistan. Ginpalapad sini ang deployment kag operasyon sang iya tropa asta sa Pilipinas.

Sa sining mga kalakasan sang US, nabusog ang mga kumpaniya nga nagahimo sang mga kagamitan panggyera. Ini pareho sang Boeing nga nagtaas sang 16.8 porsyento ang ganansya. Nagbaton man sang mga kontrata ang Raythem kag Nothrop Grumman nga mga kontraktor sa kagamitan militar kag panggyera.

Ang pinakadaku nga kumpaniya nga nagahimo sang kagamitan panggyera sa bug-os nga kalibutan, ang



Lockheed Martin, nagaganansya man sang daku. Sadtong 2000 pa gani, nagaabot sa \$17 bilyon ang ganansya sini sa mga kontrata sang Pentagon. Ang gyera mismo daku nga negosyo para sa imperyalismong US kabaylo sa linibo-libo nga inosente nga kabuhi nga ginpangdula.

Ang “gyera batuk sa terorismo” panabon lang sang gubyernong US sa matuod nga tuyo nga mangsakop sang iban nga pungsod agud magsuyop sang manggad kag superganansya, halimbawa, pareho sang langis. Importante ang langis para makaandar ang mga industriya sang US nga nagahimo sang kagamitan panggyera. Dominante sa ekonomya sang US ang produksyon sang kagamitan panggyera.

Sa interes pa lang sang pamilyang Bush, imperyalistang handum sini ang dugang nga pagmonopolyo sang industriya sa langis sa kalibutan. Sila ang may monopolyo sa mga kumpanya sa langis nga Spectrum, Harken Oil & Gas, kag may kapital man sa ExxonMobil kag madamo pa nga korporasyon sa produksyon sang enerhiya.

Ginsalakay sang US ang Afghanistan kay kuno diri nagapugad si Osama bin Laden. Apang may tuyo ini nga kontrolahon ang amo nga pungsod bilang istrategiko nga lugar nga kuluhaan sang langis kag ruta sang suplay halin sa sentral nga Asya. Ginatarget naman sini ang Iraq subong nga gyerahon kay kuno “nagasapupo sang mga terorista”. Apang tuyo sang US

nga kontrolahon ini bilang ikaduha nga pinakadaku nga suplayer sang langis sang bilog nga kalibutan.

Ginmentinar sang US ang deployment sang tropang Amerikano sa pungsod partikular sa Mindanao kay kuno laason ang Abu Sayyaf. Apang gusto sini kontrolahon ang istrategiko nga pusisyon sa tunga sang Brunei, Indonesia, Malaysia kag Pilipinas, amo man ang ruta sang internasyunal nga negosyo kag dunang manggad. Ang tatlo ka una nahinambitan nga mga pungsod mayor nga suplayer sang langis. May langis man sa Pilipinas sa bahin sang Palawan kag Sulu.

Wala nagatapna sang terorismo ang US. Ang imperyalismong US amo mismo ang numero uno nga terorista sa kalibutan kag ginasulsulan sini ang mga papet nga rehimen nga manggyera. Ini pareho sa rehimen sang Sharon sang Israel nga nagasabwag sang terorismo kag nagapangsalakay sa pumuluyong Palestino, kag rehimen sang GMA nga nagdeklarar sang “all-out war”.

“All-out war”, dikta sang terorista nga imperyalismong US

Paagi kay US State Secretary Collin Powell nga nagkadto sa pungsod sang Agosto 2, gindikta sang imperyalismong US sa papet nga rehimen sang GMA ang pagpatuman sang “all-out war”. Kasunod ini sa pagdeklarar sang US nga “terorista” ang CPP-



“Ang ‘gyera batuk sa terorismo’ panabon lang sang gubyernong US sa matuod nga tuyo nga mangsakop sang iban nga pungsod...”

NPA-NDF kag nagmandu sa rehimen nga gyerahon tudo bisan wala man gani kalabot-labot ang CPP-NPA-NDF sa Septyembre 11 nga pagpang-atake sa US.

Ini para rasonan ang pagpabilin sang tropang Amerikano kag direkta magbulig sa AFP sa pag-away sa NPA kag MILF kag magtukod sang base militar labi na sa Mindanao. Importante sa US nga imentinar ang tropa sini sa Pilipinas para pangapinan ang ila kapital, padayunon ang pagpamigos kag pagpanghimulos sa mga pumuluyo kag dugang nga magsuyop sang manggad pareho sa langis. Ang nga kumpaniya sang US sa pag-ekplorar sang langis sa pungsod nagalakip sang Union of California (Unical) Sulu Ltd., Nuevo Energy Corporation, Globex Energy Corp. kag may iban pa. Ang Unical may subsidiaryo ukon sanga sa pungsod nga amo ang Phil. Geothermal, Inc.

Ang pagpatuman sang “all-out war” sang rehimen sang GMA nagaserbi sa interes sang US. Magahatag ang US sang \$25 milyones para gastuhon sa tingub nga paglunsar sang “kampanya kontra-terorismo” nga pagaupdan sang mga tropa sang US kag

All-out War / pahina 7

Militarisasyon kag pagpang-agaw lupa

Padayon nga nagalala ang militarisasyon kag operasyon sa pagpanglupig sang 3rdID/PA sa Panay. Ang 12thIB/PA ginatimbangan sang duha ka *Reconnaissance Coys* sang 3rdID/PA kag iban nga yunit nga katumbas man sa isa ka batalyon ang pwersa. Daku nga bahin sang pwersa sini ang nakatutok sa sentral kag nabagatnan sang Panay sa pagdireher sang Task Group-Panay kag 3rdID/PA.

Apang ang pinakamilitarisado nga lugar amo ang munisipalidad sang Tapaz, Capiz. Diri, nagalab-ot sa mga 475 asta 500 ang pwersa sang 12thIB/PA kag CAFGU nga nadeploy sa mga ditatsment sa magtalambi nga 19 ka baryo sa intermidya kag kabukiran sang Tapaz. Ini nga pwersa wala pa nagalakip sang Tapaz-PNP kag pwersa sa hedkwarters sang 3rdID/PA nga nahamtang sa Jamindan, sa lindero man lang sang Tapaz. Ang *Division Strike Company* nga nakabase sa

Libot, Calinog, nagaayuda pa sa
12th IB sa pag-operasyon sa Tapaz.

Sa Tapaz ang konsentrasyon sang halos batalyon-kadaku nga pwera sang 12thIB kag CAFGU. Ini bangud diri man ang sentro sang agaway lupa sa tunga sang mga Tumandok kag 3rdID/PA.

Handum sang 3rdID/PA nga tapnaon ang tinuig na nga paghimakas sang mga Tumandok sa pagpangapin sa ila kadutaan nga ginaagaw sang militar sa ngalan sang “*army reservation*”. Ining kadutaan nga nagasakop sang 33,310 ektaryas, nagasakop sang halos katunga sang kabilugan nga kalaparon sang munisipalidad sang Tapaz kag anom ka baryo nga sakop sang Jamindan.

Interesado ang rehimen kag AFP sa kadutaan sang mga Tumandok kay magluwas sa duna sini nga manggad, diri ginahiwat ang pagtisting sang mga armas kag bomba, paghanas militar kag *war games* sang militar. Diri nakahedkwarter ang 3rdID/PA sa

Camp Macario Peralta. Diri man nga kadutaan ang ginlunsaran sang Balikpapan Exercises'94 nga ginbuylugan sang tropang Amerikano kag AFP.

Mabug-at ang presyur sang militar sa mga Tumandok nga halos tanan nga kabaryuhanan nga sakop sang ginaako nila nga “*army reservation*” ginapususiyunan sang mga ditatsment. Nagapamahug ang militar kag nagapangsensus sang mga kalalakihan agud piliton nga mag-entra sa CAFGU.

Sining Agosto, ginpadihut sang 3rdID/PA ang pagpapirma sa mga Tumandok sang isa ka apidabit sang pagpaniplang. Nasulat sa Englis nga lenggwahe, ang nasambit nga papel nagaunod sang pagdula sang mga Tumandok sang ila kinamatarung sa pagpanag-iya sang kadutaan kag ginahatag na sa Kampo Peralta.

Sa pagbuyagyag sini sang mga Tumandok sa masmidya, ginpabutyag nila nga pagmaniobra ini sang Kampos Peralta agud



pahalinon ang mga Tumandok kag mga mangunguma ilabi ang sa palibot sang Kampo. Ginakahangaw-an nila nga gamiton ang amo nga lugar para sa paghanas-militar upod ang tropang Amerikano nga magaumpisa sa Oktubre 2002.

Kabuhi-kamatayon ang paghimakas sang mga Tumandok sa pagpangapin sang ila kadutaan nga gindeklarar ni Presidente Diosdado Macapagal nga “*army reservation*” sadtong 1962. Madamo na nga kabuhi kag mga pag-antus ang ila ginbatas sa malawig na nga paghimakas. Apang upod sa iban nga mangunguma nga nagahimakas para sa kinamatarung sa duta, padayunon nila ang ila kawsa bisan pa may “*all-out war*” kag direkta nga pagpasilabot militar sang tropang Amerikano. (D)

All-out war
halin sa pahina 5

AFP. Ilunsar ini umpisa Oktubre 2002 kag sa duog nga sakop sang mga prenteng gerilya sang NPA.

Daw pabo nga bugalon si GMA kay may ginasandigan sa pagpabilin sa poder kag sa ambisyon nga magpadalagan sa 2004 nga eleksyon. Halos indi mauntat ang *operasyon-pakodak* sa kaugalingon agud makita permi sa mga pahayagan kag telebisyon. Labi nga nagsagsag ang iya pagpakatuta sa US kag nagaduso nga islan ang reaksyunaryong konstitusyon. Ini agud buksan pa gid ang ekonomya kag dulaon ang mga probisyon angut sa pungsodnon nga patrimonya pabor sa imperyalismong US.

All-out war / pahina 12

Padayon ang paglapak sa tawhanon nga kinamatarung kag internasyunal nga tawhanon nga mga layi



May okasyon sining Agosto nga ginsaulog sang gubyerno ang pagdumdom sang Internasyunal nga Tawhanon nga mga Layi (*Intenational Humanitarian Laws*). Apang sa istrimer lang ini mabasahan sa atubang sang Hall of Justice sa syudad sang Iloilo. Bangud sa kaumhan sang Panay wala untat ang paglunsar sang AFP kag CAFGU sang kampanya sa pagpanglupig. Madamo nga inosente nga pumuluyo ang nagakadalasa sa pagpanglapak sa tawhanon nga kinamatarung kag Internasyunal nga Tawhanon nga mga Layi.

Ang masunod amo ang bahin lang sang malaba kag magalaba pa nga listahan sang pagbayolar sang AFP-PNP-CAFGU sa mga kinamatarung sang pumuluyo. Sang magpusisyon ang RSOT sang PA sa mga barangay sang Wright, Katipunan, Aglinab, Abangay, Roosevelt, San Miguel Ilaya kag San Miguel Ilawod sadtong Nobyembre 11, 2001 tubtub Disyembre 23, 2001 madamo nga harasment kag pang-abuso ang ila ginahimo:

- paliwat-liwat nga ginmiting ang tumandok kag mangunguma para ipresyur sa pagtukod sang CAFGU
- pamahug kag presyur nga pasurenderon ang ila paryente nga NPA kag ginawarningan nga kon indi nila mapasurender, kabigon sila nga mga simpatisador sang NPA. Pero kon mag-entra sa CAFGU, indi sila pagkasuhan. Bangud sini madamo nga pamatan-on nga lalaki ang nagkadto sa iban nga lugar sa paglikaw nga mangin CAFGU.
- nagalibot ang elemento sang RSOT agud magsensus sa mga pamalay kag mga residente bilang kabahin sang population control.
- pagtalana sang alas-8 sang gab-i kag alas-4 sang kaagahon bilang *curfew*
- pagsaywar sa mga tawo nga nakakuha ang RSOT sang listahan halin sa mga NPA kag didto ang ngalan sang tawo nga ginasaywar nila kag presyuron sa imbestigasyon.

Tawhanon nga kinamatarung / pahina 9

Magapabilin pa tubtub sini nga Oktubre sa Basilan kag Sulu ang 160 ka US Special Forces bisan pa tapos na ang Balikatan 02-1 sadtong Hulyo. Ini agud padayunon ang gintingob nga operasyon militar sang tropang US kag AFP bilang “malawigan nga bulig-pangsiguridad”.

Ining programa sa “malawigan nga bulig-pangsiguridad” ginkasugtan sa miting sang *Mutual Defense Board* sang Hunyo sa tunga sang papet nga rehimen kag US. Ang masunod amo ang iban pa nga kasugtanan sa nasambit nga miting:

☠ Sining palaabuton nga

Oktubre, maabot naman ang mga tropang Amerikano sa paglunsar sang gintingob nga “kontra-terorismo” nga operasyon militar sa naaminhan, sentral kag nabagatnan nga Luzon. Maathag nga NPA kag rebolusyonaryong pwersa ang ginapuntarya sini. Maupod diri ang indi magnubo sa walo ka batalyon ukon 4,000 ka tropa sang AFP. Magalawig ini asta sa Hunyo 2003.

☠ Maglunsar sang “paghanas” sa syudad sang Zamboanga nga pagasakupan sang mga apat ka Light Reaction

Company halin sa US Pacific Command.

☠ Pag-upod sang mga suldado sang US sa mga operasyon pangkombat tubtub sa lebel nga mas manubo pa sa kumpanya

☠ Pagpadayon sang “*civic action*” agud masiguro kuno ang epektibidad sang mga kooperasyon militar sang US kag Pilipinas.

Madumduman pa nga sang nagligad nga Hulyo 17-28, naglabot sa 1,400 kag suldado nga Amerikano ang nagpasakop sa CARAT 2002, isa ka nabal nga paghanas nga ginhiwat sa Subic kag Cavite.

Nagapinagusto sa paglumbayag ang tropang Amerikano sa pungsod kag arbitraryo nga ginligalisa sang

rehimeng GMA paagi sa ginkalokalo nila nga MLSA (*Mutual Logistics Support Agreement*). Ginpatalsik ni GMA si Teofisto Guingona bilang sekretaryo sang Department of Foreign Affairs kag ginbuslan kay Blas Ople, para kamul-kamulon ang MLSA. Kontra si Guingona sa MLSA kag sa iban nga pagsulundan nga nagaligalisa sang interbensyon militar sang US.

Sa idalum sang MLSA, mas hilway nga makaggwa-sulod bisan ano man oras ang ma tropang Amerikano diin man nga bahin sang pungsod. Isa sa ginasisigahum nga lugar nga balikan nila amo ang Kampo Peralta, ang hedkwarters sang 3rdID, Jamindan. Ini ang sa pinakamaayo nga halanasan-militar sa Bisayas. Nagamit na ini

Tropang Amerikano / pahina 11



NAGADAGSA TROPANG AMERIKANO



■ pagtinguha nga paglugos ni Kap. De la Mota (PA) kay Rita Parapan sa Brgy. San Miguel Ilaya.

Sa *strike operations* sadtong Disyembre 2001 asta una nga simana sang Enero 2002, nagpanghalughog sang pamalay sa mga Brgy. Aglupacan, Mabini kag Minan, Tapaz ang pwersa sang PA halin sa Kampo Peralta. Ang nakuha nila amo ang mga pugakhang nga ginagamit sang mga Tumandok sa pagpangayam kag pagdepensa sa kaugalingon. Gina-ipit sang militar ang mga Tumandok nga kon mag-entra sila sa CAFGU ukon mangin impormer, indi sila pagkasuhan sang ilegal nga paghupot sang armas.

Abril 9, 2002. Pagkatapos sang isa ka engkwentro sa NPA sa Brgy. Minan, Tapaz, ginluthang sang mga tropa sang 12thIB/PA sa pagpamuno ni Lt. Mendoza ang sibilyan nga si Dante Parle bisan nagsinggit nga sibilyan siya. Ginpalukpan man nila sang M203 ang duha ka balay kag naguba ini. Gintiro man nila ang baka ni Diday Geminez kag gin-ihaw.

Hunyo 2002. Gin-imbetiga kag ginharas sang pwersa sang Alpha Coy sang 12thIB/PA si Ampong Tupas kag Anton Victor angut sa kuno kampo sang NPA sa Brgy. Sinunod, Tapaz. Gintapaktapakan kag ginturag ang parayan ni Fernandez Orido kag masobra katunga sang produkto ang nasamad. Sa amo man nga bulan, nag-*planted* sang garand sa balay ni Brgy Kapitan Mario Gimenez sang Taganghin, Tapaz, ang elemento sang 12thIB/PA. Ginpahug siya nga kon indi mag-entra sa CAFGU, kasuhan siya sang ilegal nga paghupot sang armas.

Hulyo 2000. Pagpwesto sang RSOT nga pwersa sang 12thIB/PA sa mga Brgy Sinunod, Batobato, Taganghin, Siya, Lahug kag Daan Sur—pareho sang ginhimo nila sa kulumpon nga baryo sa Katipunan—ginapilit ang mga Tumandok sa pag-entra sa CAFGU. (D)

Gutom sa isla, lapnagon kag nagalala

Ang bulan sang Agosto bulan sang tig-gulutom kapin pa sa kaumhan. Halos indi na makakaon ang mga mangunguma sang tatlo ka beses sa isa ka adlaw. Suno sa independyente nga pagpanalawsaw, sa gwa sang Metro Manila, P300 pisos nga kita kada adlaw sa kaumhan (kag P415 kon sa syudad) ang kinahanglan sang isa ka pamilya nga may anom-ka-tawo agud sila mabuhi.

Indi ini malab-ot sang mga mangunguma sa Panay. Ang bugas P50 na ang gantang. Samtang dos pesos ang kilo sang kape, barato ang kopras, kag iban pa nga produkto sang mga mangunguma. Maiwat ang palamugnan kag kon may ara gid man, kulang pa sa isa ka gantang sang bugas ang suhol.

Ang mangunguma kulang sa kapital kag wala man ayuda pangserbisyo ang gubyrerno samtang madugay na nga permi manubo ang ila panubason. Ang mga kalamidad labi lang nga nagpakita sang kapabayaang sang gubyrerno. Tuhtub lang ini sa pagdeklarar nga “*calamity area*” ang apektado nga lugar sa isla.



Halin pa sang Disyembre 2000 kag una nga binulan sang 2001, madamo na sang halit ang nag-alagi nga bagyo. Subong, P119 ka milyon naman ang ginhalit sang bagyong Milenyo sa bug-os nga Nakatundan nga Kabisay-an. Ang halit sa agrikultura sa Iloilo naglab-ot sa masobra P21 milyon kag sa Antique, masobra P3 milyon.

Wala gid nakabawi ang mga mangunguma. Sa surbey sang Bureau of Agriculture Statistics (BAS) sang gubyrerno, 1.2% ang gin-nubo sang produksyon sa palay sa subong ikumparar sa nagligad nga tuig nga nag-abot sa 12.95 milyon ka metriko tonelada sa rehiyon 6.

Bisan si Leonardo Montemayor, sekretaryo sang Department of Agriculture, sa iya pagkadto sa Iloilo sang nagligad nga semana nag-ako nga magalawig pa ang gutom. Ini bangud 300,000 metriko tonelada sang palay na ang napyerde sang sunod-sunod nga kalamidad. Dugangan pa sang estimeyt nga 700,000 metriko tonelada nga ihalit sang palaabuton nga El Nino, isa ka milyon metriko tonelada ang madula sa produksyon sa Rehiyon 6 sa sulod sang 2002.



Ang plano sang rehimeng GMA amo ang pag-import sang dugang nga 1.4 milyon metriko tonelada nga bugas sa iban nga pungsod. Agud makaganansya pa ang gubyrno, ibaligya ini sang mga traders kag NFA sa mataas nga presyo. (D)

PAHIBALO


Ang Daba-Daba ginbalhag sang Partido Komunista sang Pilipinas sa Isla sang Panay. Ini nagagwa kada 3 ka bulan.

Para sa dugang nga pagpauswag sang aton pahayagan, ang tanan nga bumalasa sang Daba-Daba gina-imbita nga magpadala sang ila mga kontribusyon, rekomendasyon kag mga pagsaway.

Mga paghulag sang mangunguma

Bangud sang gutom, ginatos ka mangunguma sa nagkalain-lain nga kabanwahanan sang Iloilo, Capiz kag Guimaras ang determinado nga nagdemanda sang subsidyo halin sa probinsyal kag mga munisipal nga gubyrno. Apang, klaro sa mga resulta sang pagpakigdayalogo sa mga opisyaes sang probinsya kag banwa nga ang lokal nga gubyrno inutil sa pagsabat sang demanda sang pumuluyo sini. Kon may ara man, kalabanan sini pangako lang kag mumho lang sa aktwal nga kinahanglanon sang mangunguma.

Sa banwa sang San Lorenzo, probinsya sang Guimaras, pagkatapos sang *dialogue* upod sa mga lider-mangunguma, nagkomiter ang gubyrnong lokal sang 20 ka sakos nga bugas



para sa pumuluyo.

Sa mga banwa sang Oton, Maasin kag Janiuay, ang mga mangunguma nagkadto man sa gubyrnong lokal agud magdemanda sang subsidyo. Ginpangakuan sang mayor sang Janiuay nga si Frankie Locsin ang pumuluyo nga i-alokar ang P65,000 nga *savings* sang banwa para sa *relief*. Wala pa sang *relief* nga natabu. Pangako man ang ginhatag sang mga opisyaes sang banwa sang Maasin sa mga mangunguma nga nagkadto. Kutob subong, ang pumuluyo sang Oton nagahulat sang sabat sang banwa.

Samtang, naghatag si Gobernador Tupas sang 5 ka sako sang bugas bilang personal niya nga bulig para sa mangunguma sa panahon sang gutom. Ginpromisa man sang gubernador nga makakuha ang mga mangunguma sang

buy-one-take-one nga abono sa Department of Agriculture. Ang 5 ka sako nga bugas ginduruho sang ginatos ka mangunguma sa lain-lain nga banwa.

Sa probinsya naman sang Capiz, ang makomiter gid lang sang lokal nga gubyrno amo ang 38 ka sako nga bugas nga pagahurayon sa 31 ka barangay sang mga banwa sang Tapaz, Jamindan, Dumarao, Cuartero kag Maayon.

Sa banwa sang Dumarao, nagpakigdayalogo ang mga mangunguma sang Stockfarm, Bungsuang. Mga biktima sila sang pagpangharas kag pagpanghalit sang mga armado nga tinawo sang Bureau of Animal Industry ukon BAI kag mga elemento sang 314th Mobile Force sang PNP. Naghatag ang banwa sang 48 ka sako sang bugas. (D)

Tropang Amerikano halin sa pahina 8

sang mga tropang Amerikano sa Balikatan-94.

Ang MLSA nagahatag man kahilwayan sa US sa pagtukod sang mga pasilidad agud pulunduhan sang mga suplay, gamit kag armas, lakip na ang armas nukleyar. Sa sini, epektibo nga magamit sang US ang Pilipinas bilang lulunsaran sang mga aksyon militar sa Asya-Pasipiko kag iban nga bahin sang kalibutan. (D)

SONA ni GMA, ginpakamalaut sang mga militante



Ginpakamalut sang masobra sa 1,700 ka militanteng pumuluyo ang kabutigan nga ginapasuni sang rehimeng Macapagal-Arroyo sa *State of the Nation Address* sini sadtong Hulyo 22. Sa isa ka hublag protesta, ginpanawagan sang mga militante nga organisasyon ang pagpatalsik kay GMA.

Kabaliskaran sang arogante nga deklarasyon ni GMA nga ginatukod sini ang isa ka “mabaskog nga republika,” ginaantus sang pumuluyo ang nagalala nga krisis sa ekonomiya. Ginpakamalaut man sang pumuluyo ang malubha kag walay pili nga paglapas sang estado sa mga tawhanon nga kinamatarung. Ini sa pagtinguha sang rehimen nga pungan ang pagpamatok kag paghimakas sang pigos nga pumuluyo. Samtang, dalayon na nga ginhublasan sang rehimen ang kaugalingon sini nga ido-ido sang imperyalistang US.

Indi makatingalahan kag nagakadapat lang nga tawgon si Macapagal-Arroyo nga “reyna sang mga anay.” (D)

Linibo ka pumuluyo, naghulag batuk sa PPA

Masobra sa 8,000 ka pumuluyo sa bug-os nga isla sang Panay ang nag-upod sa mga paghulag agud pamatukan ang imposisyon sang Power Purchased Adjustment ukon PPA.

Sa syudad sang Iloilo, kag sa pagpamuno sang Archdiocese of Jaro kag sang Power of Iloilo, masobra sa 6,000 ka pumuluyo nga naghalin sa nagkalain-lain nga sektor sang sosyedad ang nagtipon sa Rotary Amphitheatre sadtong Setyembre 20 agud pakamalauton ang PPA kag ang Electric Power Industry Reform Act (EPIRA) sa isa ka *prayer-rally*.

Samtang, sa Roxas City, malapit sa 2,000 ka pumuluyo ang nag-upod sa isa ka *prayer-rally* nga ginpangunahan sang Diocese of Capiz.


Sa iban nga bahin sang isla, naghulag man ang pumuluyo sa nagkalain-lain nga porma. Ang Diocese of Antique naglunsar sang *signature-campaign* batuk sa PPA. Samtang, may *symposium* nga ginhiwat angut sa PPA sa Kalibo, Aklan. Ginpasakupan ini sang mga lideres sang mga relihiyosong organisasyon, militanteng grupo kag iban pa nga mga organisasyon nga padayon nagapamatuk sa PPA. (D)




2,000 nagmartsa sa adlaw sang pagdeklarar Martial Law

Masobra sa 2,000 ka pumuluyo ang nagmartsa sa dalanon sang syudad sang Iloilo sadtong Setyembre 21 agud ipakita ang ila pagpamatuk sa padayon nga nagasingki nga terorismo sang estado. Ginpasakupan ini sang pumuluyo halin sa nagkalain-lain nga bahin sang isla sang Panay kag Guimaras. A n g pumuluyo liwat nagpanawagan

sang pagpamatuk sa terorismo sang rehimeng US-GMA sa tunga sang nagahuro-huro nga krisis sa pulitika, sosyo-ekonomiko kag pinansya.

Ini ang pangtakop nga aktibidad sang 3-ka-adlaw nga paghulag sang pumuluyo sa bug-os nga isla. Ang aktibidad ginbuksan sang isa ka *torch parade* sa dalanon sang syudad kag 2 ka gab-i nga *camp-out* sang mga nagaprotesta nga mangunguma. 

All Out War
halin sa pahina 7

Apang determinado ang mga pumuluyo nga paslawon ining padihut sang rehimen kag imperyalismong US. Ang paglutos sang "*all-out war*" paagi sa malawigan nga inaway banwa pagpaslaw man sa terorista nga padihut sang US, upod sa iban nga pumuluyo sa kalibutan nga nagapamatuk sa imperyalismo tubtub ini mapukan. 

Caduy

